

## *U' MANTEDDU I' SAN FRANCISCU*

Si cunta e si ricunta  
chi nu' jonnu san Franciscu,  
chiddu i' Paula, pi' esseri precisi,  
truvannusi a' Catuna, 'nta marina,  
'nci dissi o' patruni i' na barca  
si 'nci dava nu passaggu pi' Missina.

"Sicuru,"- nci rispusi u' barcaiolu -  
"sempri, però, si mi pagati".  
"Soddi no 'nni tegnu, figghiu miu,  
ca' sugnu poviru pi' amuri di Diu,  
e pi' chistu no aiju chi t'a' ddari".  
"No si fa' nenti, jò vogghiju i dinari",  
riplicavu buriusu u' marinaru.

U' santu, umili e placidu com'era,  
si misi a prigari 'nta na cantunera,  
e decisi prontamenti e cu' fidi:  
stesì u' so' mantu supra o' mari  
e cu' nu frati ddassupa si paravu,  
e lentamenti u' strittu travirsavu.

Inutili 'u chiamavu u' barcaiolu  
chi vidennu stu miraculu s'attirrivu.

San Franciscu sbarcavu a Missina  
'nto latu i' susu da marina,  
vicinu a crèsia da Madonna a' Grutta,  
e 'i dda triunfannu si puttavu  
a Milazzu unni a genti l'aspittavu.

Si cunta puru ca' u' barcaiolu,  
chi di nomi facià Petru Consolu,  
a Cristu, pi' stu miraculu, si cunvirtivu.

27 Agosto 2010

G. M.